

Altocomisario Dolfi Richardson cu logro historico pa Caribe Hulandes

ORANJESTAD - E echo cu Polisnan di Sint Maarten, Corsou, islanan BES y di Aruba a participa hunto den un curso intensivo pa por forma parti di e Team di aresto di e diferente Cuerponan di Polis di nan respectivo paisnan, no a sosode pa suerte ni casualidad.

E ta parti di un logro y iniciativa cu a sali for di nos propio Altocomisario di Polis, esta mr. Adolfo "Dolfi" Richardson, siendo un miembro di e colegio di hefe di cuerpo policial.

Henk Peters, hefe di e teamnan di aresto di Hulanda, mescos cu e Altocomisarianan di Polis di e diferente paisnan participante, tabata na Aruba siman pasa pa entrega di e baretnan blauw na e graduadonan. El a sigura cu e realisacion di e curso aki a conta cu un prestacion unico.

Ta intencion pa den futuro e islanan mes sigui duna e curso tambe, cu e meta pa tur team ta para fuerte y tin suficiente Polis pa por haci e tipo di arestonan asina, cu tin un caracter peligroso of di hopi risico.

Altocomisario di Cuerpo Policial di Aruba, mr. Adolfo "Dolfi" Richardson a splica cu e curso tabata un iniciativa di e Colegio di Hefenan di Cuerpo di e islanan den Caribe Hulandes. A sinti un necesidad pa bin cu un curso nobo, pasobra e ultimo a tuma luga na aña 2004, pues mas di 10 aña pasa.

E Comisario a acerca Hulanda den nomber di Colegio hefenan di cuerpo y nan a keda hopi contento cu e noticia cu D.S.I y e Academia Policial di Hulanda a aporta na e proyecto. Hunto cu tur e autoridadnan riba nivel di Gobierno a logra e sosten



necesario.

Ta haciendo plannan caba pa expande e cursonan pa otro aña como parti di iniciativanan di e Colegio di Hefe di cuerpo. Ta posibel cu e siguiente curso specialisa lo tuma luga na Aruba atrobe, pero no tin un decision final ainda.

Richardson ta convenci cu lo por recluta mas miembro pa e team di aresto pa otro aña. Si tene cuenta cu desaroyonan mundial, cada organisacion hudicial mester tin e tipo di unidadnan aki den nan organisacion. Mester ta ekipa y cla pa atende cu cualkier situacion cu presenta.

Altocomisario di Cuerpo Policial di islanan BES, Hildergart Buitink, a bisa cu e colaboracion tabata excelente, e proposicion di Richardson pa bin cu e curso pa team di aresto tabata un super idea y a

logra resultadonan fabulosos. El a splica cu islanan BES ta contento cu, ademas di tabatin e training aki na nan disposicion, cu e tin tres Polis siguiendo e curso di Kader na Aruba.

Islanan BES ta haya hopi asistencia di e otro islanan y tur e Cuerponan di Polis ta siñando hopi di otro.

"Aruba a yuda marca historia pa e islanan," segun Altocomisario Suplente di Sint Maarten, Karl John. El a splica cu e mes tabata un miembro di team di aresto y e sa con dificil ta pa haya un curso asina pa via di e gastonan.

A cuminsa papia caba den Colegio di hefenan di Cuerpo pa expande riba e tema y ofrece mas curso y ya tin plannan basta serio pa otro aña; asina e colaboracion ta sigui crece, asina Altocomisa-

rio Karel John a expresa.

"E resultado aki ta inspira nos pa sigui riba e ruta aki", asina Drs. Mauricio Sambo, Altocomisario di Cuerpo Policial di Corsou a duna di conoce. E ta referi na e colaboracion cu tin awendia entre e Cuerponan di Polis den Caribe Hulandes. "Cada un di e islanan tin medianan limita pa mehoracion di e personal trahando tur dia.

Pero dor di uni forsa nos ta crea e recursonan pa nos por haci esakinan mas regular", segun e hefe di Polisnan di Corsou.

E ta kere cu e tema di haci cursonan hunto mester bira un punto di agenda fiho den e reunionnan di Colegio di Altocomisarianan di e region. "Mi ta haya cu nos mester sigui riba e ruta aki, el a bay masha bon mes y mi ta kere

cu nos mester sigui cu esaki".

Comandante di Marinierskazerne Savaneta, Jan ten Hove a splica cu un curso asina ta un unico cu ta pas den e pensamiento di su organisacion cu nan ta referi na dje como e 3D: Defensie, Development & Diplomacy.

Esaki ta encera un vision y strategia pa brinda mas sosten na partnernan na Aruba manera Cuerpo Policial, Team di Aresto, KIA, Aeropuerto, Waf y otronan. Marina Real kier contribui na estabilidad y seguridad pa asina entre otro asisti den protege turismo, cu ta un industria hopi sensibil.

A sostiene e curso aki habiendo nan porta pa uza nan facilidadnan pa training y ofreciendo instructornan riba nivel di combatimento di terrorismo. □

